

Thamani ya Maombi ya Siri

Enyi watu, mtumainini sikuzote, Ifunueni mioyo yenu mbele zake; Mungu ndiye kimbilio letu—**Zaburi 62:8.**

Utambuzi wa kina wa hitaji na shauku yetu kuu kwa ajili ya mambo tuyaombayo lazima vidhihirike katika maombi yetu, vinginevyo hayatasikiwa. Lakini hatupaswi kuchoka na kukoma kuomba kwa sababu jibu halijapokelewa papo hapo. “Ufalme wa mbinguni hupatikana kwa nguvu, nao wenye nguvu wauteka” (Mathayo 11:12). Nguvu hapa humaanisha bidii takatifu, kama ile aliyoiionesha Yakobo. Hatupaswi kujitahidi kuomba mpaka tupate hisia kali, bali kwa utulivu, bila kukoma, tunapaswa kukaza maombi yetu kwenye kiti cha enzi cha neema. Kazi yetu ni kunyenyekeza nafsi zetu mbele za Mungu, kukiungama dhambi zetu na kwa imani kumsogelea Mungu.... Ni mpango wa Mungu kujidhihirisha Mwenyewe katika riziki Zake na katika neema Yake. Lengo la maombi yetu lazima liwe kwa utukufu wa Mungu, si kwa ajili ya kujitukuza wenyewe....

Mungu ametuthamini kwa kuonesha jinsi anavyotuthamini sana. Tumenunuliwa kwa gharama, damu ya thamani ya Mwana wa Mungu. Wakati urithi Wake utakapofuata Neno la Bwana kwa umakini mkubwa, baraka Yake itawajia juu yao katika kujibu maombi yao. “Lakini hata sasa, asema Bwana, nirudieni mimi kwa mioyo yenu yote, na kwa kufunga, na kwa kulia, na kwa kuombolea; rarueni mioyo yenu, wala si mavazi yenu, mkamrudie Bwana, Mungu wenu; kwa maana yeye ndiye mwenye neema, amejaa huruma; si mwepesi wa hasira, ni mwingi wa rehema” (Yoeli 2:12, 13).

Katika maombi ya faragha nafsi inapaswa kuwekwa wazi katika uchunguzi wa jicho la Mungu.... Maombi ya faragha ni ya muhimu sana—nafsi ikijumuika na Mungu! Maombi ya faragha yanapaswa kusikiwa na Mungu tu msikiza-maombi. Hakuna sikio lenye shauku lipaswalo kupokea mzigo wa maombi. Kwa utulivu, lakini kwa bidii, nafsi inapaswa kumwendea Mungu; na kisha utamu wa kudumu utakuwa mvuto unaotoka kwa Yeye aonaye sirini, ambaye sikio lake liko wazi kwa maombi yatokayo moyoni. Yeye ambaye kwa imani sahili hufanya ushirika na Mungu atajikusanyia miale ya nuru ya Mungu ili kumtia nguvu na kumwezesha katika pambano na Shetani.